



Na: Frakshon di UPB
Atenshon sr. J. Kroon

Tópiko: Terminashon di negosashon pa formashon di koalishon.

Kralendijk, 4 di mart 2026

Apresiabel señor Kroon,

Pa medio di e karta akí nos ke informá partido UPB ku nos no a keda ku ningun otro opshon sino di terminá e negosashonnan entre nos partidonan pa un posibel formashon di un koalishon nobo konsiderando e echo ku UPB ta den negosashon den un fase avansá kaba ku partido demokrat pa un koalishon nobo.

Nos ta sumamente desapuntá den e echo ku despues di mas di un luna di esfuerso pa yega na un gobièrnu nobo, UPB sistemátikamente a stroba e trayekto di negosashon.

Durante e proseso lo siguiente a bira evidente:

1. Promé ku e trayekto formal a kuminsá, UPB kaba a informá M21 ku nan por partisipá den un koalishon nobo, pero sin risibí ningun diputado. Naturalmente, esaki a dominá e promé reunion entre M21, UPB i Frakshon Serberie, desviando e enfoke di e negosashon.
2. Despues di esaki, den un reunion supliká pa señora Serberie, UPB a pone komo kondishon ku nan no ke sinta na mesa ku señora Coffie komo representante di M21, alegando ku e ainda tabata parti di e koalishon bieu. Pa fasilitá progreso, señora Serberie a disidí di komplasé ku e demanda akí. Den e reunionnan siguiente a logra yega na sinku punto di prioridat, unda punto number unu pa UPB tabata drecha e parti di finansa.
3. Ora e tema di repartishon di diputado a bini riba mesa, UPB a deklará ku nan ke risibí dos diputado den e koalishon nobo, miéntras MPB i Frakshon Serberie a indiká ku nos ke pa kada frakshon tin su diputado, den spiritu di igualdat, balansa i kolaborashon.
4. Pa sorpresa di nos tur, UPB finalmente no a skohé e direktorado di Finansa sino esun di R&O, aunke UPB públikamente a indiká ku finansa ta nan promé prioridat ku nan ke atendé kuné. MPB tambe públikamente a indiká interes den e direktorado di R&O. MPB, den spiritu di kompromiso, a laga e direktorado di R&O pa UPB komo e partido mas grandi. Sinembargo, ora señora Serberie a indiká ku e ke mantené diputado Weber pa

Finansa, UPB no a mostra disposishon pa konsiderá e nominashon akí, i e negosashonnan a bolbe pega.

Durante e mesun periodo, nos a tuma nota ku e bosero di UPB tabata hasi deklarashonnan negativo na media tokante e partnernan, miéntras nos ainda tabata na mesa ta purba yega na un solushon.

5. Ora e negosashon a keda pegá riba e nominashon di un diputado, señora Serberie a mostra fleksibilidat i a proponé un otro profeshonal. MPB tambe a mostra kompromiso, a disidí di tuma e kartera di Finansa i a proponé un otro persona pa e kargo. Pa nos sorpresa, nos proposishon revisá a bolbe keda rechasá dor di UPB. Den nos último reunion a bira kla ku UPB a bai bèk na su posishon original di ke risibí dos diputado.

Nos a konstatá ku tin diferente direkshon den UPB internamente, kual ta hasi e trayekto ainda mas difísil pa yega na un gobièrnu.

Despues di sinku okashon den kua UPB sistemátikamente a wanta òf stroba e proseso, nos mester lamentablemente konkluí ku e interes primario di UPB no ta stabilidat di gobernashon, no ta interes di Boneiru, sino posishon di diputado pa partido UPB por profilá prome ku elekshon.

Tambe a bira evidente ku mientras UPB ta na mesa ta negoshá ku nos, na mes momento UPB ta na mesa di negosashon tambe ku partido Demokrat. Nos a risibí konfirmashon ku e negosashon ta basta leu ta bai ku Partido Demokrat pa formashon di un otro koalishon.

MPB no ta haña ku ta étiko ku ta na mesa ta negoshá dos diferente koalishon pareu i pesei MPB ta disidí di hala nos mes for di mesa di negosashon ku UPB na e momento nan aki.

Nos ta deseá partido UPB tur éksito den kualke trayekto ku nan disidí di sigui pa formashon di un gobièrnu nobo.

Atentamente,

Na nòmber di e frakshon di MPB

A handwritten signature in black ink, appearing to be 'H. Thielman', written over a horizontal line.

H. Thielman

Lider di frakshon di MPB